



City of Boston
Mayor Michelle Wu
Mayor's Office for Immigrant Advancement

SIDADI DI BOSTON RESEBE DIZIGNASON DI SIDADI AKOLHEDOR SERTIFIKADU DI 4-STRÉLA

Priméru sidadi na Massachusetts ki resebe dizignason di Sidadi Akolhedor Sertifikadu.

BOSTON – Segunda-fera, 17 di agostu di 2026 – Prizidenti di Kámara Michelle Wu, Mayor's Office for Immigrant Advancement (MOIA - Gabinete di Avansu di Imigranti di Prizidenti), y *Welcoming America* anunsia ma Sidadi di Boston resebe dizignason di [Certified Welcoming](#) (Sidadi Akolhedor Sertifikadu) di 4 stréla di [Welcoming America](#), ki rikunhise Boston komu un líder nasional na kria pulítikas, prugramas y práttikas ki ta apoia inkluzon y sentimentu di pertensimentu di imigrantis.

Sima **Prizidenti di Kámara Michelle Wu** fla, “Boston sênpri foi un sidadi moldadu pa pesoas ki ben di mundu interu pa konstrui un futuru midjor pa es, pa ses família, y pa ses kumunidade. Nu ten orgulhu di resebe es dizignason stóriku, ki ta rikunhise prugrésu y trabadju kontinuadu na nos sidadi interu, pa Boston pode ser un lar pa tudu algen. N ta agradese nos Gabinete di Avansu di Imigranti, parserus di kumunidade, y líderes kultural y di zónas, ki djudá-nu alkansa es etapa fundamental, na midida ki nu ta kontinua ta avansa”.

Atravê di se prusésu di *Certified Welcoming*, Boston kunpri kritérius na tudu séti ária di [Welcoming Standard](#) (Padron di Akolhimentu), ki é gia di *Welcoming America* pa konstrui kumunidades inkluzivu: lideransa di guvénu y di kumunidade, asésu ekuitativu, involvimentu síviku, kumunidades ligadu, idukason, dizenvolvimentu ikonómiku, y kumunidades siguru.

Es rikunhisimentu sta baziadu na sforsus kontinuadu di MOIA, atravê di se inisiativa ki txoma *City of Belonging* “*You Belong Here*” (Sidadi di Pertensimentu “Bu ta Faze Párti di Li”), un kanpanha munisipal ki ta insentiva tudu morador a xinti benvindu, valorizadu y kapasitadu pa kontribui pa futuru di Boston. Es dizignason ta rifleti más di ki un konprumisu sinbóliku — Boston dja konstrui sistémas, prugramas, y parserias ki ta djuda moradoris antigu y nóvu a partisipa y a ten susésu.

Atravê di se selebrason anual di [Welcoming Week](#) (Simana di Akolhimentu) na mês di siténbru, MOIA tanbe sa ta kontinu ses sforsu di divulgason na sidadi interu, pa informa moradoris y partilha rikursus, pa tudu vizinhu xinti inspiradu pa apoia zónas akolhedor.



City of Boston
Mayor Michelle Wu
Mayor's Office for Immigrant Advancement

Mariangely Solis, Xéfi di Ekuidadi y Inkluzon, fla ma “Forsa di Boston ta ben di pesoas ki ta mora li, inkluidu nos vizinhos imigranti ki ta kontribui pa tudu ária di nos vida síviku, kultural y ikonómiku. Es dizignason ta rifleti nos konprumisu kontinuadu di kria un sidadi undi ki asésu a língua, opurtunidad di ikonómiku y sentimentu di pertensimentu sta integradu na manera ki nu ta sirbi nos moradoris”.

Déntu di prusésu di sertifikason, MOIA lidera un rivizon abranjenti di pulítikas, prugramas y prátikas di Kámara Munisipal rilasionadu ku inkluzon di imigrantis. Kel prusésu distaka invistimentus di Boston na asésu a língua, dizenvolvimentu di lideransa pa imigrantis, sirvisus jurídiku, dizenvolvimentu di mon-di-óbra, involvimentu di kumunidade, y parserias ku organizasions ki ta sirbi moradoris imigranti.

Courtney White, Diretora-Izekutiva Interina di Gabinete di Avansu di Imigranti di Prizidenti, fla ma “Resebe es statutu di Sidadi Akolhedor Sertifikadu di 4 stréla é rizultadu di un sforsu konjuntu entri guvénu munisipal y kumunidades imigranti, ki partilha ses spiriénsias, prioridadis y vizon pa futuro di Boston. Es rikunhisimentu ta selebra prugrésu ki nu alkansa y, mésmu ténpu, el ta fortalese nos konprumisu di kontinua ta konstrui un sidadi undi ki tudu morador imigranti pode ten asésu a rikursus, partisipa totalmenti, y xinti ma es ta faze párti di li”.

Kumunidades imigranti di Boston ta riprizenta diversidadi, riziliénsia y inovason ki ta poi es sidadi bira más fórti. Atravê di prugramas y inisiativas sima prugramas di lideransa pa imigrantis, subsídus kumunitáriu, parserias ku sirvisus jurídiku, apoiu pa sidadania, y sforsus di involvimentu di kumunidade, MOIA ta trabadja pa prumove ekuidadi y alarga opurtunidadis pa moradoris imigranti.

Daniel Valdez, Diretor Adjuntu di Welcoming America fla ma “Trabadju ki fazedu na Boston pa alkansa es dizignason, y ki involve guvénu munisipal, organizasions di kumunidade, y moradoris imigranti ki molda-l, é isénsia di akolhimentu na prátika. É apropiadu ki es kuza kontise na 250º aniversáriu di Mérka, li na bérsu di Rivuluson Merkanu. Nu ten orgulhu di rikunhise Boston komu priméru kumunidade Akolhedor Sertifikadu na Massachusetts, y nu sta ansiozu pa odja kuzê ki ta ben dipos”.

Dizignason di Sidadi Akolhedor Sertifikadu di 4 stréla di Welcoming America é sô más un nun lista kada bês más grandi di rikunhisimentus y markus ki ta rifleti módi ki Boston é un lar pa tudu algen. Otus sforsu di MOIA ta inklui:



- Alarga asésu a sirvisus jurídku di imigrason, ku apoiu pa organizasons kumunitáriu di konfiansa ki ta ofere se asisténsia jurídku baratu ô di grasa.
- Apoia prugramas di Inglês pa Pessoas ki ta Fala Otus Língua (ESOL), ki ta djuda moradoris imigranti dizenvolve konpiténsias linguístiku, prokura opurtunidadis di idukason, y riforsa mobilitadi ikonómiku.
- Lansa y spandi *Immigrants Lead Boston* (Imigrantis ta Lidera Boston), un prugrama di lideransa ki dja forma moradoris imigranti di várius zóna di Boston pa es bira líderes kumunitáriu.
- Kria opurtunidadis pa imigrantis jóven atravê s di prugrama *Immigrant Youth Advancement* (Prumuson di Imigrantis Jóven), ki ta da moradoris jóven asésu a splorason di karera, orientason, dizenvolvimentu di lideransa, y opurtunidadis di trabadju.
- Riforsa involvimentu di kumunidade atravê s di inisiativas sima *Community Office Hours* (Oráriu di Atendimentu di Kumunidade), undi ki MOIA ta leba rikursus munisipal dirétamenti pa zónas, na unidadi s lokal di *Boston Public Library* (Bibliotéka Públiku di Boston).
- Prumove sforsus di asésu linguístiku di Kámara Munisipal, pa djuda moradoris ten asésu a sirvisus, informason y rikursus di guvé rnu, independenti di língua ki es ta pâpia.

Entri dias 10 y 19 di siténbru, Simana di Akolhimentu na Boston ta inklui prugramas di arti, saúdi, idukason y ikonomia, y tanbe ivéntus virtual y prizensial, pa prumove Sirvisus Munisipal y kes séti ária di Padron di Akolhimentu. Pa odja kalendáriu di ivéntus, vizita: www.boston.gov/welcoming.

###

Sobri Gabinete di Avansu di Imigranti di Prizidenti

Gabinete di Avansu di Imigranti di Prizidenti (MOIA) sta inpenhadu na riforsa kapasidadi di imigrantis pa partisipa di manera total y ekuitativu na vida ikonómiku, síviku, sosial y kultural di Boston. MOIA tanbe ta prumove rikunhisimentu y intendimentu públiku di kontribuisons di imigrantis pa Sidadi. Pa fika ta sabe más, vizita: boston.gov/immigrants.

Sobri Welcoming America

Welcoming America é un organizason sên fins lukrativu y ki ka é di ninhun partidu, ki ta lidera un muvimentu pa kumunidade s inkluzivu y di susésu, garantindu ma tudu algen ta xinti benvindu. Nu ta kridita ma tudu algen, inkluidu imigrantis, é



City of Boston
Mayor Michelle Wu
Mayor's Office for Immigrant Advancement

kontribuinti valiozu y fundamental pa susésu di nos kumunidades y di nos futuro djuntu. Pa fika ta sabe más, vizita: welcomingamerica.org.

Sobri Certified Welcoming

Certified Welcoming (Sidadi Akolhedor Sertifikadu) é un dizignason formal pa guvérnus lokal ki dja kria pulítikas y prugramas ki ta rifleti ses valoris y konpromisu ku inkluzon di imigrantis. Es prugrama inovador ta avalia sforsus di guvérnus lokal pa inklui y resebe imigrantis na tudu ária di vida síviku, sosial y ikonómiku di ses kumunidades. Ku un dizignason di Sidadi Akolhedor Sertifikadu, kumunidades ta distaka ses sforsus lokal, ta konstrui un vantaji konpitivu, y ta ten asésu a opurtunidades di partilha ses prátikas di akolhimentu nun palku rijional, nasional y global. Pa fika ta sabe más, vizita: certifiedwelcoming.org.